

# ამბროლაურის მთაწკაქ



ამბროლაურის  
მუნიციპალიტეტი

№4 (9899) ◆ აპრილი, 2023 წელი ◆ ფასი 50 თეთრი ◆ გაზეთი გამოდის 1933 წლის 3 მაისიდან

## ქ რ ი ს ტ მ ა დ დ გ ა !

### გილოცავთ აღდგომის ბრწყინვალე დღესასწაულს!

ნიკორწმინდაში წმ. ნიკოლოზის სახელობის საკათედრო ტაძარში სააღდგომო საღმრთო ლიტურგიას, რომელიც აღავლინა ნიკორწმინდელმა ეპისკოპოსმა ვახტანგმა, რაჭა-ლეჩხუმისა და ქვემო სვანეთის სამხარეო ადმინისტრაციის, ადგილობრივი თვითმმართველობის ხელმძღვანელ პირებთან და მაჟორიტარ დეპუტატთან ერთად დაესწრო საქართველოს პარლამენტის თავმჯდომარე შალვა პაპუაშვილი და აქედან მიულოცეს სრულიად საქართველოს აღდგომის ბრწყინვალე დღესასწაული.



7 აპრილს მართლმადიდებელმა ეკლესიამ ხარების ბრწყინვალე დღესასწაული აღნიშნა. დღესასწაულთან დაკავშირებით, ნიკორწმინდელმა ეპისკოპოსმა მეუფე ვახტანგმა, ეპარქიის სამღვდელთაგან ერთად, საღვთისმშობლის მიძინების ტაძარში აღავლინა, რომელსაც რაჭა-ლეჩხუმისა და ქვემო სვანეთის სახელმწიფო რწმუნებულის პირველი მოადგილე ქრისტინა კობახიძე, ამბროლაურის მუნიციპალიტეტის საკრებულოს თავმჯდომარესთან – ასლან საგანელიძესთან ერთად დაესწრო.



ხარების დღესასწაულთან დაკავშირებით, ამბროლაურის მუნიციპალიტეტისა და საქართველოს წითელი ჯვრის საზოგადოების თანამშრომლობის ფარგლებში, მრავალშვილიან და სხვადასხვა საჭიროების მქონე 70-მდე ოჯახს საყოფაცხოვრებო ნივთები და ტანსაცმელი გადაეცათ.

აღდგომის ბრწყინვალე დღესასწაულთან დაკავშირებით ქ. ამბროლაურის ღვთისმშობლის სახელობის ტაძრის წინამძღვარმა – დეკანოზმა მამა ელიზბარმა და მღვდელმა – მამა პეტრემ სხვა სასულიერო პირებთან ერთად ქალაქის ქუჩები აკურთხეს.

\*\*\*

აღდგომის ბრწყინვალე დღესასწაული მიულოცეს და სააღდგომო ნობათები პირადად გადასცეს ადგილობრივი თვითმმართველობის ხელმძღვანელმა პირებმა სოციალურად დაუცველ 72 ოჯახს.

## კულტურის მინისტრი რაჭაში

საქართველოს კულტურის, სპორტისა და ახალგაზრდობის მინისტრი თეა წულუკიანი ქვეყნის სალოტბარო სკოლებში ვიზიტის ფარგლებში ამბროლაურში სტუმრობისას სახელმწიფო რწმუნებულ პაპუნა მარგველიძესთან, საქართველოს პარლამენტის წევრსა და მაჟორიტარ დეპუტატ გოჩა

ენუქიძესთან, ამბროლაურის მუნიციპალიტეტის საკრებულოს თავმჯდომარე ასლან საგანელიძესთან, მერ ზვიად მხეიძესთან და ადგილობრივი ხელისუფლების სხვა წარმომადგენლებთან ერთად ეწვია სსიპ ანზორ ერქომაიშვილის სახელობის ფოლკლორის სახელმ-

ნიფო ცენტრის დირექტორ გიორგი დონაძესთან ერთად, ამბროლაურის სალოტბარო სკოლას, რომელიც კულტურის სამინისტროს მხარდაჭერით და ფოლკლორის ცენტრის ინიციატივით დაფუძნდა 2014 წელს. 2022 წელს განხორციელდა სარეაბილიტაციო სამუშაოები და ამ ეტაპზე სკოლაში 44 მოსწავლე სწავლობს.



მინისტრი ანსამბლის „საგალობელი“ წევრებს შეხვდა და სასიამოვნო ინფორმაცია გააუღერა: სამინისტროს მხარდაჭერით ანსამბლი მიმდინარე წლის ზაფხულში პარიზში, ლევილში გაემგზავრება და ქართულ მინაზე სამინისტროს



მინისტრი გაეცნო სალოტბარო სკოლის მუშაობასა და ინფრასტრუქტურის მდგომარეობას. შეხვედრაზე სკოლის მოსწავლეებმა საკუთარი შემოქმედება წარმოადგინეს. მინისტრმა მადლობა გადაუხადა ადგილობრივი მუნიციპალიტეტის წარმომადგენლებსა და პედაგოგებს რეგიონში ქართული ფოლკლორის მხარდაჭერისათვის.

მხარდაჭერით დაგეგმილ ღონისძიებაში მიიღებს მონაწილეობას, რითაც საკუთარ შემოქმედებას უცხოელ აუდიტორიასა და იქ მცხოვრებ ქართველ ემიგრანტებს გააცნობს.

\*\*\*

თეა წულუკიანმა ამბროლაურის სახვითი ხელოვნების მუზეუმიც მონახულა და მის დირექტორთან, მხატვარ ბესო კობახიძესთან ერთად, მუზეუმის განვითარების შესაძლებლობებზე იმსჯელა. მუზეუმი 1965 წლიდან ფუნქციონირებს და მასში დაცულია ლადო გუდიაშვილის, ელენე ახვლედიანის, ავთო ვარაზის, ზურაბ ნიჟარაძისა და სხვა ქართველ მხატვართა ფერწერული, გრაფიკული, კერამიკული, სკულპტურული ნამუშევრები, ჭედურობის ნიმუშები.

მინისტრი ქვეყნის სალოტბარო სკოლებში ვიზიტის ფარგლებში ონის მუნიციპალიტეტსაც სტუმრობდა (თემის გაგრძელება იხილეთ მეოთხე გვერდზე).

## ჭ მ შ მ პ რ ი ტ ა დ ა დ დ გ ა !

### სხდომა ონლაინ რეჟიმში

სამხარეო ადმინისტრაციაში ონლაინ რეჟიმში გაიმართა მორიგი საკონსულტაციო საბჭოს სხდომა, რომელზედაც განხილულ იქნა ევროკავშირისა და გერმანიის მთავრობის მიერ დაფინანსებული პროექტის „ეკონომიკური და სოციალური ცხოვრების კატალიზატორი (CESL) – ფარგლებში (ახორციელებს გერმანიის საერთაშორისო თანამშრომლობის საზოგადოება), გამოცხადებულ საპროექტო იდეების კონკურსზე წარდგენილი საპროექტო იდეები.

სხდომამ იმსჯელა ქ. ამბროლაურში, მახალდიანის ქუჩის მიმდებარე სანაპიროს ტერიტორიაზე, რაჭის კულტურული ძეგლების მინიატურული მაკეტების და ტურიზმის განვითარების მიზნით, ქ. ამბროლაურის შემოსასვლელში რაჭული ფოლკლორის ამსახველი ქანდაკებების მოწყობის შესახებ ამბროლაურის მუნიციპალიტეტის მერიის მიერ წარდგენილ განაცხადებზე და ერთხმად მოიწონა აღნიშნული საპროექტო იდეები.

საბჭომ ასევე განიხილა და მოიწონა რეგიონებში განსახორციელებელი პროექტების ფონდიდან, მხარის ოთხივე მუნიციპალიტეტში მეთორმეტაპის ფარგლებში დასაფინანსებელი პროექტები.

### გაფართოებული შეხვედრა

ამბროლაურის კულტურის ცენტრში გაიმართა ადმინისტრაციულ ერთეულებში მერის წარმომადგენლებთან, მუნიციპალური ა(ა).ი.პ.-ს, შ.პ.ს-ის ხელმძღვანელებთან და თანამშრომლებთან გაფართოებული შეხვედრა, რომელსაც უძღვებოდნენ რაჭა-ლეჩხუმისა და ქვემო სვანეთის სახელმწიფო რწმუნებულის პირველი მოადგილე – ქრისტინა კობახიძე, ამბროლაურის მუნიციპალიტეტის მერი – ზვიად მხვიძე და საკრებულოს თავმჯდომარე – ასლან საგანელიძე.

შეხვედრაზე განიხილულ იქნა აღნიშნულ სამსახურებში არსებული მდგომარეობა, მიმდინარე სამუშაოები, დაგეგმილი ღონისძიებები. იმსჯელეს პრობლემურ საკითხებზე. ზოგიერთი მიმართულებით არსებულ ხარვეზებსა და მათი მოგვარების გზებზე, აგრეთვე იმ ინიციატივებზე, რომელთა განხორციელება ხელს შეუწყობს სხვადასხვა პროექტში ახალგაზრდების აქტიურად ჩართვას. მერის წარმომადგენლებმა ისაუბრეს სოფლებში მიმდინარე ინფრასტრუქტურულ პროექტებზე და მოსახლეობის საჭიროებებზე. ითქვა ისიც, რომ მუნიციპალიტეტის სოფლებში მიმდინარე დასუფთავების სამუშაოებში სოციალური პროგრამით დასაქმებულების გარდა აქტიურადაა ჩართული მოსახლეობაც და დაგეგმილია სიახლეები როგორც ინფრასტრუქტურულ პროექტების, ისე კულტურის, ტურიზმის და სხვადასხვა სფეროების მიმართულებით.

შეხვედრაზე, რომელიც ძირითადად კითხვა – პასუხის რეჟიმში წარიმართა, შეფასდა მუნიციპალიტეტში არსებული მდგომარეობა და დაისახა კიდევ სამომავლო გეგმები.

### ქალბატონი ნანა

სიცოცხლე ღმერთისაგან ბოძებული სასწაულია, რომელიც მილიონი ალბათობიდან ჩვენ გვარგუნა უფალმა. ჩემი აზრით, ყველა ადამიანი გარკვეულ მისიას აკისრებს უფალი. მან უწყის ვის როგორი ტვირთი აპკიდოს: ზოგს მძიმე და ძნელად შესასრულებელს დააკისრებს, ზოგს კი ბედის ნებიერს, იოლად შესასრულებელი ხვდება წილად, იმასაც ვფიქრობ, ტვირთის სიმძიმე იმაზეა დამოკიდებული, ვინ რა პასუხისმგებლობით მოეკიდება განგების ნებას, ყველა საქმე სიყვარულით უნდა კეთდებოდეს, უნდა გიყვარდეს ადამიანი და ამ გადასახედიდან უნდა ხედავდეს ყოველ შემხვედრ პრობლემას.

ადამიანია სამყაროს ცენტრი!  
ადამიანია ადამიანის ღმერთი! როცა გიჭირს და საშველს არსაიდან ელი, უცებ რომ გამოჩნდება პიროვნება, შეიძლება სრულიად უცნობი, და რომ დაგაძლევინებს სირთულეს, ყოველგვარი საჭიროების გარეშე, განკაცებული ღმერთია, აბა, რა! კრიტიკულ მომენტში უფალი თავის რჩეულებს არ ტოვებს.

აზრი გამეცქა და სიტყვა გამიგრძელდა. მინდა, ჩვენი უბნის ექიმს, საოცრად თბილსა და გულსხმიერ პიროვნებას, ადამიანის ფასის შესანიშნავად მცოდნესა და დამფასებელს, ქალბატონ ნანა ზობოხიძეს, მივულოცო აღდგომის ბრწყინვალე დღესასწაული და როგორი თბილიც თვითონ არის თავისი პაციენტების მიმართ, ისეთივე თბილი სიტყვებით წარმოვაჩინო მისი პიროვნება, რა თქმა უნდა ჩემი გადმოსახედიდან. მიზეზთა გამო, შეიძლება, ხშირად ვერ სტუმრობდეს ველებს, მაგრამ თითქმის ყოველ საღამოს გეზულობს თემში მაცხოვრებელთა ჯანმრთელობის მდგომარეობას, საჭიროების მიხედვით კონტაქტს ამყარებს შეუძლოდ მყოფთან, მარილიანი და თბილი სიტყვით გაამხნევეს, მისცემს სათანადო დარიგებას, თუ საჭიროდ მიიჩნევს, საავადმყოფოში დაიბარებს, თვითონ მიიყვანს სათანადო დარგის სპეციალისტთან, დაეხმარება გამოკვლევების ჩატარებაში, წამლებს გამოუწერს, ნუგეშს მისცემს, მოეფერება და გამოისტუმრებს თითქმის გამოჯანმრთელებულს, რადგან მკურნალი ექიმი ხომ 80 პროცენტით სიტყვაა და 20 პროცენტით ნამალი, მეტი რა ქნას, ღმერთი არ არის, უფლის გარიგება რომ შეცვალოს, ადამიანს კი რაც შეუძლია, არ იშურებს. მისი ქმედება ადამიანების სიყვარულითა და პროფესიონალიზმიდან მომდინარეობს იმედის ნაპერწკლის გასაჩენად, თვითრწმუნის გასაძლიერებლად.

გმაღლობთ, ქალბატონო ნანა, რომ არსებობთ!  
თქვენთან ერთად გაზაფხულსა და აღდგომის დღესასწაულს ვულოცავ, ჩვენი რაიონის ჯანმრთელობის სადარაჯოზე მდგომ ყველა ექიმსა და ყველა მუშაკს. ყველას ადამიანთა სიყვარულით გვეკეთებინოს ჩვენი საქმე. მხოლოდ სიყვარული და უფალი თუ გვიხსნის კატაკლიზმებითა და დენითი დამუხტული ტექნიკის საუკუნის პრობლემებისაგან.

უფალი ჩვენთან!

პაპა ჭიჭინაძე

### ინფორმაცია

გაიმართა ამბროლაურის მუნიციპალიტეტის მეორე მოწვევის საკრებულოს 38-ე რიგგარეშე სხდომა, რომელმაც მოიწონა მუნიციპალიტეტში 2023 წელს განსახორციელებელი პრიორიტეტული პროექტების დაფინანსების მიზნით მომზადებული საპროექტო წინადადებები. ცვლილებები შეიტანა მუნიციპალიტეტის საკრებულოს 2017 წლის №18, №20 და 2018 წლის №15 დადგენილებებში, აგრეთვე 2017 წლის №20 განკარგულებაში. განიხილა საკითხი „ამბროლაურის მუნიციპალიტეტის სოფლებში მდებარე უსახელო ქუჩების არაბული ციფრებით სახელდების შესახებ“.

სხდომამ დაამტკიცა – ამბროლაურის მუნიციპალიტეტის მეორე დაფუძნებული არასამეწარმეო (არაკომერციული) იურიდიული პირების მოსწავლეების მუნიციპალიტეტის ფარგლებს გარეთ ორგანიზებულ ღონისძიებებზე მივლინებისას კვებით უზრუნველყოფისათვის საჭირო თანხის ოდენობისა და ანაზღაურების წესი.



„ამბროლაურის მუნიციპალიტეტის ახალგაზრდობის განვითარების სტრატეგია 2023-2025“ და „ამბროლაურის მუნიციპალიტეტის ახალგაზრდობის განვითარების სტრატეგიის 2023 წლის“ სამოქმედო გეგმა.

\*\*\*

ამბროლაურის მუნიციპალიტეტის მეორე მოწვევის 39-ე მორიგმა სხდომამ მოიწონა და შეაფასა მუნიციპალიტეტის მერიის საფინანსო, სოციალური და ჯანდაცვის

სამსახურების უფროსების მიერ წარმოდგენილი ანგარიშები ამბროლაურის მუნიციპალიტეტის 2023 წლის ბიუჯეტის პირველი კვარტალის შესრულებისა და ამბროლაურის მუნიციპალიტეტის 2023 წლის სოციალური და ჯანდაცვის პროგრამების მიმდინარეობის შესახებ.

### პროექტების ნუსხა დამტკიცებულია

საქართველოს რეგიონებში განსახორციელებელი პროექტების ფონდიდან „სოფლის მხარდაჭერის“ პროგრამის ფარგლებში ამბროლაურის მუნიციპალიტეტში განსახორციელებელი პროექტების დაფინანსებისათვის გამოყოფილია 734000 ლარი. შესაბამისად მუნიციპალიტეტის საკრებულომ დაამტკიცა მოსახლეობის მიერ შერჩეული პროექტების ნუსხა და დასახელებების მიხედვით განაწილებული თანხაც, რის თანახმადაც წელს 18 ადმინისტრაციულ ტერიტორიულ ორგანოში შემავალ სოფლებში განხორციელდება 69 პროექტი. მათგან ძირითადია სასმელი წყლის სისტემების და სათავე ნაგებობების რეაბილიტაცია. კერძოდ ტბეთში, გოგოლათში, ჩორჯოში, ზედა შავრაში, პირველ ტოლაში, ქედის უბანში, მუხლში, ხიმში, ლიხეთში, ინაში ნიკორმინდაში, სულ 24 სოფელში, რაც სწორი და მისასაღმებელი არჩევანია. ბოსტანში და უყეშში მოეწყობა სანიტარული არხები. პატარა ონში ჩიკვაძეების და ჯებაშვილების, ქვედა შავრაში ჭელიძეებისა და გვენცაძეების ხოტევეში ყრუაშვილების საუბნო გზების რეაბილიტაცია.

ჭრებალოში, გენდუშში და ჟოშხაში რეაბილიტირებული იქნება აგრეთვე სალოცავსა და სავარგულეზამდე მისასვლელი გზები, ველეშში, ზნაკვაში, ზედა და ქვედა თლულში შემოიღობება და კეთილმოეწყობა სასაფლაოები, ხოლო სხვაგვარი შეკეთდება სასაფლაოებამდე მისასვლელი გზა. მე-2 ტოლაში, ხვანჭკარაში, ნამანეშში, აბარში მოეწყობა სკვერები, ღვიარაში განხორციელდება ნაპირსამაგრი სამუშაოები. ბარულში, აბანოეთში, ქვიშარაში, თხმორში, კაჩაეთში, ფუტყეთში, ზედა ღვარდიში, ბაჯში მოეწყობა გარე განათება, ხოლო ხონჭიორში გზისპირა მოსაცდელი...

წინა წლების მსგავსად იქ, სადაც „სოფლის მხარდაჭერის“ პროგრამით გამოყოფილი დაფინანსება არჩეული პროექტის რეალიზაციისთვის არ აღმოჩნდა საკმარისი, ადგილობრივი ბიუჯეტიდან თანადაფინანსებით მოხდა მოსახლეობის სურვილის დაკმაყოფილება. მაგალითად: ბუგეულში და ძირაგეულში სასმელი წყლის სისტემების, ზედა ჭყვიშში სასოფლო გზის რეაბილიტაციის, გურესაშვილების და გაბიციანაშვილების უბანში სანიტარული არხების, საკეციაში სპორტული მოედნის მოწყობას დასჭირდა თანხების დამატება და 38 000 ლარი გამოიყო კიდევ.

ე.ი. წელს სულ „სოფლის მხარდაჭერის“ პროგრამით განსახორციელებელ პროექტებზე დაიხარჯება 772 000 ლარი, რაც ნამდვილად არაა მცირე თანხა და თუ გონივრულად შერჩეული პროექტების რეალიზაციის პროცესებს მოსახლეობა პასუხისმგებლობით, მოქალაქეობრივი პოზიციიდან მიაღწენებს თვალს შედეგაც სასურველი იქნება.

იმედია, მოსახლეობის და შემსრულებელთა პოზიციები დამთხვევა ერთმანეთს და იქნება მხოლოდ საქმის კეთილსინდისიერად შესრულებაზე ორიენტირებული.

### ეპროპის იმუნიზაციის კვირეული

ევროპის იმუნიზაციის კვირეული ყოველწლიურად აპრილის ბოლოს იმართება ჯანმრთელობის მსოფლიო ორგანიზაციის ეგიდით. წელს კვირეული 23-29 აპრილს ჩატარდება, ტრადიციულად დაავადებათა კონტროლისა და საზოგადოებრივი ჯანმრთელობის ეროვნულ ცენტრთან მჭიდრო თანამშრომლობით.

საქართველოში იმუნიზაციის სახელმწიფო პროგრამას საფუძველი ჩაეყარა 1996 წელს სახელმწიფო პროგრამით 0–18 წლის ასაკის მოსახლეობის ვაქცინაცია მიმდინარეობს 13 ინფექციის საწინააღმდეგო ვაქცინით, ესენია: ტუბერკულოზის, დიფტერიის, ყვიანახველას, ტეტანუსის, პოლიომიელიტის, ნითურას, ნითელას, B ჰეპატიტის, როტავირუსული ინფექციის, ადამიანის პაპილომავირუსის, პნევმოკოკური ინფექციის და ჰემოფილუს ინფლუენცია ტიპი ბ საწინააღმდეგო ვაქცინა და გამოიყენება WHO-ს, EMA-ს, FDA-ს მიერ რეკომენდებული და აღიარებული ვაქცინები, რაც მაღალი ეფექტურობისა და უსაფრთხოების გარანტია, პროგრამული ვაქცინები უფასოა მომხმარებლისთვის – ვაქცინის ღირებულებას სრულად ფარავს სახელმწიფო იმუნიზაციის პროგრამის ფარგლებში ამავე პრინციპების დაცვით სახელმწიფო ქვეყნის მოსახლეობას უზრუნველყოფს გრიპის, ანტირაბიული, ყვითელი ცხელებისა და COVID-19-ის საწინააღმდეგო ვაქცინებით, ზოგიერთი დაავადების/მდგომარეობის საპროფილაქტიკო ან სამკურნალო ბიოაქტიური პრეპარატი.

საქართველოში 2019 წლიდან დაწესდა პაპილომა ვირუსის საწინააღმდეგო აცრა 10–11–12 წლის გოგონებში. 2022 წელს ასაკი 18 წლამდე გაიზარდა. 2023 წელს კი --26 წლამდე.

15 წლამდე ასაკობრივ ჯგუფში ვაქცინაცია ორჯერადია მინიმუმ 6 თვის ინტერვალით.

15-26 წლის ასაკობრივ ჯგუფში პაპილომა ვირუსის საწინააღმდეგო აცრა სამჯერადია 0–2–6 თვე. პირველ და მეორე აცრას შორის მინიმალური ინტერვალი უნდა იყოს არანაკლებ ერთი თვე, ხოლო მეორე და მესამე დოზას შორის მინიმალური ინტერვალი არანაკლებ სამი თვე.

ვაქცინაცია სიცოცხლისთვის საშიში დაავადებებისგან დაცვის ყველაზე მნიშვნელოვანი საშუალებაა. თქვენც შემოგვიერთდით

ამბროლაურის საზოგადოებრივი ჯანდაცვის ცენტრი


### 9 აპრილი ეროვნული ერთიანობის სიმბოლო



ჩვენი ქვეყნის ისტორიაში 1989 წიდან 9 აპრილს ორმაგი დატვირთვა აქვს. თითოეული ქართველისათვის ეს დღე არის ტრაგიკული, ამავდროულად გამარჯვების, ვაჟკაცობის, ქვეყნის სიყვარულისა და დამოუკიდებლობისთვის ბრძოლის სიმბოლო. რადგან ამ დღეს უდიდესი გამარჯვება და თავგანწირვა გამოიჩინეს ქართველებმა, რაც თავისუფლებისა და დამოუკიდებლობის მოპოვებით დასრულდა.

34 წელიწადი გავიდა და ტრადიციულად წელსაც ქვეყნის მასშტაბით პატივი მიაგეს იმ გამარჯვების ხსოვნას, რომელთა ღვაწლი ქვეყნის წინაშე შეუფასებელია.

9 აპრილს, ეროვნული ერთიანობის დღეს, დაღუპულთა ხსოვნას პატივი მიაგებს და თანამშლელებთან ერთად ყვავილებით შეამკვს მემორიალი ამბროლაურის მუნიციპალიტეტის საკრებულოს თავმჯდომარემ **ასლან საგანლიძემ** და მერმა **ზვიად მხეიძემ**.



ქართველთათვის განსაკუთრებულად ძვირფასია 14 აპრილი, რომელიც 1990 წლიდან აღინიშნება, როგორც დედაენის დღედ. მამაპაპათაგან დატოვებული სამი საუნჯიდან – მამული, ენა, სარწმუნოება, 1978 წელს საფრთხე დაემუქრა ენას. საბჭოთა კავშირის გადანეკვტილებით მოკავშირე რესპუბლიკებში კონსტიტუციით სახელმწიფო ენად რუსული მტკიცდებოდა.

საამაყა, რომ მაშინ მხოლოდ საქართველოს მოსახლეობამ ინტელიგენციის წარმომადგენლებთან ერთად შეძლო მასობრივი გამოსვლებით წინ აღდგომოდა იმპერიას და არ დაუშვა ქართული ენის, როგორც სახელმწიფო ენის გაუქმება.

1990 წლიდან 14 აპრილი ქვეყანაში დანესებულია დედა ენის დღედ. დედა ენის, რომელსაც ერმა ძველიც აუგო და მრავალსაუკუნოვანი ისტორია აქვს. მას სამწუხაროდ, მამულთან და სარწმუნოებასთან ერთად, დღესაც საფრთხე ემუქრება. ენა განძია და მას დაცვა, გაფრთხილება უნდა.

არ დაგვავინყდეს ეს თითოეული ჩვენთაგანის პატივისა და ღირსების საქმეა.

### სოფლის მეურნეობა - სტრატეგიული სფერო

ხელისუფლებამ სოფლის მეურნეობა სტრატეგიულ სფეროდ განსაზღვრა, რადგან ქვეყნის მომავალი ძლიერი სოფლის გარეშე წარმოუდგენელია. ძლიერი სოფელი კი ძლიერი ფერმერია, რომლებიც ბოლო წლებში სახელმწიფოსაგან მეტ მხარდაჭერასა და ყურადღებას იღებენ. ბუნებრივია, ჩვენს რეგიონშიც ამ მიმართებით ბოლო წლებში სასიკეთო ცვლილებები შეიმჩნევა, რაშიც დიდი როლი სოფლის მეურნეობის სააგენტოს რაჭა-ლეჩხუმისა და ქვემო სვანეთის რეგიონული სამსახურის წვლილი (ხელმძღვანელი ანა კანთელაძე), რომელმაც ახლახანს (აპრილში) 10 წლის იუბილე აღნიშნა. დანიტერესებულ პირებთან კონტაქტებით, კონსულტაციებით, არსებული პროგრამების პირობების გაცნობით, ხელშეწყობითა თუ თანამშრომლობის სხვა ფორმებით სამსახურის კვალიფიციური დარგების სპეციალისტებმა რეგიონში 14400 ფერმერს, ადგილებზე თუ ფერმერულ მეურნეობებში, გაუწიეს დახმარება.

შედეგიცაა. ყოველწლიურად იზრდება ფერმერული მეურნეობების შემქმნელთა რაოდენობა, რაც იმაზე მიუთითებს, რომ გასული საუკუნის 90-იან წლებში შექმნილი ვითარების გამო მივიწყებული სოფლის

მეურნეობის დარგების აღდგენა-განვითარება აქტიურად მიმდინარეობს რეგიონში. ცხადია, ამბროლაურის მუნიციპალიტეტშიც, რომელსაც მიუხედავად მცირე მინიანობისა, საუცხოო ტრადიციები გააჩნდა სხვადასხვა დარგების განვითარების კუთხით. თუმცა მაინც მეღვინეობა-მევენახეობა იყო ის დედაძარღვი, რომლითაც იკვებებოდა რაიონის შესაბამისი სოფლები. ჩვენც რეგიონულ სამსახურთან თანამშრომლობით ვინყებთ ახალ რუბრიკას – „**ძლიერი სოფელი - ძლიერი ფერმერი**“, რომლის ქუდის ქვეშაც მკითხველს გავაცნობთ იმ ადამიანებს, რომლებმაც მამა-პაპისეული ფუძე კი არ მოშალეს, გააძლიერეს. კრეატიული აზროვნებით, საკუთარი გარჯით მიაღწიეს იმას, რომ ქვეყნის საზღვრებსაც გასცდნენ, საკუთარი პროდუქციის რეალიზაციით დოვლათიც შექმნეს და უფრო ცნობადი გახადეს მუნიციპალიტეტი. ერთი სიტყვით ეს ადამიანები, უკვე ფერმერებად წოდებული, ქვეყანასაც ადგიან და საკუთარ თავსაც.

მათ უნდა იცნობდეს საზოგადოება. გვიანდა მაგალითებად იქცნენ არამარტო აქაურებისათვის, არამედ გაქალაქელებულ თანაკუთხელებისთვისაც. კარგია, რომ შემომხმარი „**კარის მამულების**“ ძებნა დაიწყო

შთამომავლებმა, იქნებ კიდევ უფრო მეტ სახლს შემოეხსნას სიმარტოვის მარწუხები. იქნებ ისევ ხალხმრავალი გახდეს ჩვენი სოფლები.

რეგიონულ სამსახურში გაგვიმარტეს, რომ დარგის სპეციალისტები მზად არიან სოფლებსა და ქალაქს შორის იმ ხიდის ასაგებად, რომელიც დაეყრდნობა წლების მანძილზე დაგროვილ ცოდნას, თანამედროვე სიახლეებისა და არსებული რესურსების თანხვედრით ეფექტურად, სწორად გამოყენება-დანერგვას. ე.ი. საქმიანობის მთავარი მოტივატორია სოფლის მეურნეობის დარგების მუდმივი განვითარება და წინსვლა. რედაქციისა და სამსახურის აზრები ემთხვევა ერთმანეთს და რუბრიკით „**ძლიერი სოფელი - ძლიერი ფერმერი**“ მკითხველს ვთავაზობთ სერიიდან პირველ წერილს, რითაც ვინყებთ კიდევ, როგორც ახალი სახელების გაცნობას, ისე მათი საქმიანობის პოპულარიზაციასაც.

დღეს ამბროლაურის მუნიციპალიტეტში „**ალექსანდრეულისა**“ და „**მუჯურეთის**“ ჯიშის ვაზით გაშენებული ვენახის შექმნები სწრაფად იზრდება. საარსებო სივრცის მოძიება გრძელდება. მევენახე ფერმერი ქალბატონებით ვინყებთ. აი ისინიც: **შორენა პატარიძე** და **ხატია წვერავა**.

### ეკომეურნეობაზე ორიენტირებული ფერმერი

სწორად კეთდება შეფასებები იმასთან დაკავშირებით, რომ საქართველომ ღვინის ექსპორტის ტრადიციული ბაზრების ჩანაცვლება უნდა შეძლოს. ისეთ ბაზარზე უნდა გადაერთოს, სადაც ქართული ღვინო უფრო მეტად ფასობს და ბევრად მაღალ ფასშიც იყიდება. ასეთია ევროკავშირის ბაზარი, სადაც ექსპორტისათვის მეღვინეებს კონკრეტული რეგულაციების დაკმაყოფილება უწევთ. მათ შორისაა ბიოსერტიფიცირება.

ეკომეურნეობაზე ორიენტირებული ერთ-ერთი ბიოსერტიფიკატის მფლობელი მეღვინე რაჭაში **შორენა პატარიძეა**. ვაზის სიყვარული მშობლებიდან გადმოეცა. მათთან ერთად ვენახში ფუსფუსი მისთვის უცხო არასოდეს ყოფილა და როცა საჭირო გახდა სოფელში დაბრუნდა, მშობლებს მხარში ამოუდგა და საოჯახო მეურნეობა არა მარტო გადარჩინა არამედ გააფართოვა კიდევ. ბაბუისეული მარანი თვითრეალიზაციისათვის ღია სივრცე აღმოჩნდა. დღეს ბუგეულში 2 ჰექტარზე ალექსანდრეულის და მუჯურეთის ჯიშებით გაშენებულ ვენახის ფართობს ფლობს და საკუთარ ღვინის ქარხნასაც, სადაც მუდმივად დასაქმებული ჰყავს ორი ადამიანი, ხოლო სეზონურად ასაქმებს 10-ზე მეტს.



თავიდანვე გადწყვიტა ვაზის მოვლა ბიოპრეპარატებით და ევროკავშირის, ავსტრიისა და შვედეთის პროექტ „**GRETA**“-ს დახმარებით სერტიფიკატზე აიღო, რის შედეგადაც თავისი ღვინო ექსპორტზეც გაიტანა. ღვინო ევროკავშირის ბაზარზე ცნობილია სახელით – „**პატარიძეების რაჭული**“ და დიდი მოწონებითაც სარგებლობს. კერძოდ ამერიკაში, იტალიაში, საფრანგეთსა და ჩინეთში. შორენამ ასევე „**GRETA**“-ს პროექტის ფარგლებში შეიძინა უჟანგავი ცისტერნები, კლერტსაცვლელი და მინიტრაქტორი. ასევე სოფლის განვითარების სააგენტოს რაჭა-ლეჩხუმისა და ქვემო სვანეთის რეგიონული

სამსახურის მხარდაჭერით ჩაერთო სახელმწიფო პროგრამაში „**გადამამუშავებელი და შემნახველი საწარმოები**“.

შორენა აქტიურად მონაწილეობს ადგილობრივ აგროფესტივალებში და საზღვარგარეთ დაგეგმილ ღვინოს გამოვენა – გაყიდვის ღირებულებებში, ესწრება მეღვინეობის მიმართულებით სხვადასხვა ტრენინგებსაც. ერთი სიტყვით შორენა, როგორც ქალი მენარმე. მარკეტოლოგი, ფინანსისტი და რაც მთავარია, როგორც მოქალაქე მაგალითია საზოგადოებისათვის. წარმატებები მას სამომავლო ფართომასშტაბიანი გეგმების განხორციელებაში.

### ძველებური გემოს დაბრუნება ახლით

**ხატია წვერავა** მეუღლესთან და სამ შვილთან ერთად რაჭაში სოფელ ძირაგულში ცხოვრობს, მეუღლის ოჯახი ოდითგანვე მისდევდა მევენახეობას. ხატია ამ გადწყვიტა ეს ტრადიცია გაეგრძელებოდა და დიდი მონდომებით ჩაერთო ღვინის წარმოებაში. 1 ჰექტარზე გაშენებული აქვთ ალექსანდრეული, მუჯურეთული, შავი კაბისტონი და ძველშავი. ყურძენს ტრადიციული მეთოდით საუკუნოვან ხის სანახელებში წურავენ. ჯერ-ჯერობით 500 ლიტრამდე ხვანჭყარას აწარმოებენ, რომელიც გამოირჩევა გემოვნური თვისებებით. ღვინის წარმოებასთან ერთად დაეება იდეა დაეშაბდებინა „**რაჭული ლორიც**“, რადგან რაჭულ სუფრაზე ღვინის განუყოფრი ნაწილი ტრადიციულად ხომ

შებოლილი ლორია. მან არასამთავრობო ორგანიზაცია WWF (ბუნების მსოფლიო ფონდი)-გან მოიპოვა მცირე გრანტი. მოაწყო შესაბოლო ოთახი და დაიწყო ლორის დამზადება, რომელმაც დიდი მოწონება დაიმსახურა.

ორივე პროდუქტის რეალიზება ძირითადად ადგილობრივ ბაზარზე ხდება, პირადი შეკვეთებით ექსპორტზეც გააქვთ. რაჭა-ლეჩხუმის და ქვემო სვანეთის რეგიონული სამსახურის დახმარებით და (LDA) რაჭის მდგრადი განვითარების ასოციაციის მხარდაჭერით მოიპოვა გრანტი, რომლითაც შექმნილი იქნა დახლ-მაცივარი, სადაც ზაფხულის პერიოდში ლორის შენახვით შესაძლებელი გახდა წარმოების გაზრდა, ამით ხარისხიან პროდუქციაზე დიდი

მოთხოვნა წამოვიდა. რამაც ხატიას კიდევ ახალი იდეის რეალიზებისათვის სტიმული მისცა. გადწყვიტა მომხმარებლისათვის შეეთავაზებინა ისეთი რამ რაც ტრადიციულიცაა და სიახლეც. ასეთი აღმოჩნდა „**საშობაო ლიქიორი**“, რომელიც მზადდება ძველი წესით ანუ მზეზე დადუღებულის ბოთლებში ჩამოსხმა. ეს იყო ძველებური გემოს დაბრუნება ახალი სახით. ხატია მუდმივად ახალი იდეების ძიებაშია. სამომავლოდ ფიქრობს დაამზადოს ღვინის კონიაკი. პროდუქციის წარმოებაში და საოჯახო ბიზნესის განვითარებაში მას ძალიან ეხმარება სხვადასხვა ფესტივალებში სისტემატური მონაწილეობა, აგრეთვე სოფლის მეურნეობის მიმართულებით სხვადასხვა ტრენინგებში ჩართულობა.

# წარმატებული პრემიერა

ამბროლაურს კულტურული ცხოვრების უმდიდრესი ისტორია გააჩნია. გამორჩეულად მაინც თეატრალური კუთხით. რაიონის თითქმის ყველა სოფელში მოქმედი სცენისმოყვარეთა ჯგუფების არსებობა იმაზე მოუთხოვდა, რომ ინტელიგენციას კარგად ჰქონდა გაცნობიერებული თეატრის როლი და მისი კეთილი გავლენის მნიშვნელობა ახალგაზრდა თაობაზე. ძირითად კერად და წამმართველ

ცენტრად მაინც, 1929–30 წლებში ადგილობრივი და ქალაქელი რაჭველების შემოწირულობით აგებული, ხის ჩუქურთმისანი კლუბი იყო, რომელიც 1935 წელს კულტურის სახლად გადაკეთდა. 1946 წელს აიგო დღევანდელი კულტურის სახლი, რომლის სცენაზე დადგმულ და პროფესიონალურ დონეზე შესრულებულ სპექტაკლებს მაყურებელი არასოდეს მოკლებია. 1959 წლიდან ამბროლაურის

თეატრი საქართველოში „სახალხო თეატრის“ წოდების მატარებელია.

საქართველოს კულტურის, სპორტისა და ახალგაზრდობის მინისტრი თეა წულუკიანი რაჭაში სამუშაო ვიზიტისას სამხარეო ადმინისტრაციის, ადგილობრივი თვითმმართველობის ხელმძღვანელ პირებთან, მაჟორიტარ დეპუტატთან, მუნიციპალიტეტისა და თეატრის სფეროს წარმომადგენლებთან, ამბროლაურის კულტურის ცენტრის დირექტორთან და თეატრის სამხატვრო ხელმძღვანელთან ერთად, კულტურის ცენტრში გამართული სპექტაკლის „ბოსტანი კონფლიქტის ზონაში“ პრემიერას დაესწრო, რომელიც მოწვეულმა რეჟისორმა მამუკა ცერცვაძემ დადგა.

სპექტაკლი ეხება აგვისტოს ომის მოვლენებს და მასში ამბროლაურის თეატრის მსახიობებთან ერთად, მონაწილეობდნენ: ონის თეატრის მსახიობი გიორგი ბერიშვილი, ზესტაფონის უმანგი ჩხეიძის სახელობის თეატრის მსახ-



იობები ნანუკა ისიანი და გიორგი გლოველი, ამბროლაურის თეატრის დასიდან მსახიობები – ზაზა მეტრეველი, ირინა ჩიხრაძე, ლილიანა მხეიძე, თამარ ობოლაშვილი, ლადო გოგოლაძე, დავით დაუშვილი, გელა ისიანი და სხვანი.

მინისტრმა თეატრის ხელმძღვანელობას, ადგილობრივი და მოწვეულ მსახიობებს მიულოცა წარმატებული პრემიერა და სხვადასხვა რეგიონის თეატრის დასებს შორის თანამშრომლობის გაღრმავების მნიშვნელობაზე ისაუბრა. თეა წულუკიანი პრემიერაზე მოწვეულ სხ-

ვადასხვა რეგიონის კულტურის ცენტრების წარმომადგენლებს სამინისტროს მიერ სპეციალურად სახალხო თეატრებისთვის დაარსებული „სილნალის თეატრალური ფესტივალი“ შესახებ ესაუბრა და მასში მონაწილეობისკენ მოუწოდა. მინისტრმა მადლობა გადაუხადა ადგილობრივი მუნიციპალიტეტს თეატრისთვის სამართლებრივი სტატუსის მინიჭების საკითხზე მუშაობისთვის, რაც კულტურის სამინისტროს თეატრის რეალური მხარდაჭერის საშუალებას აძლევს.



## გენდერი ფოკუსში

ამბროლაურის ზრდასრულთა განათლების ცენტრმა, „გენდერი ფოკუსში, ქართული თემები მდგრადი განვითარებისათვის“ პროექტის ფარგლებში, გენდრის ფესტივალს უმასპინძლა. მოენყო ზრდასრულთა განათლების ცენტრის კურსების ნამუშევრებისა და სამხატვრო სკოლის მიერ წარმოდგენილი ნახატების გამოფენა. ასევე, რაჭული სამხარეო სასტერ კლასი. ხოლო, მუსიკალურად ფესტივალი გააფორმეს: ქალთა ანსამბლმა „იანანა“, ამბროლაურის მუსიკალურმა სკოლამ და ბენდმა „კიდო ბანა“.

ფესტივალს ესწრებოდნენ რაჭა-ლეჩხუმისა და ქვემო სვანეთის სახელმწიფო რწმუნებულის პირველი მოადგილე – ქრისტინა კობახიძე და ამბროლაურის მუნიციპალიტეტის საკრებულოს თავმჯდომარე ასლან საგანელიძე.

## მილოცვა შეგობარს

ზურაბ მხეიძე სამეგობროსათვის დიდი გულის ადამიანია. ამავდროულად ხელოვანი. მისი ნახატები, თბილ და ლამაზ ოჯახში, ზღაპრულ სამყაროს გიქმნის. საოცარი ზამთრის პეიზაჟებით დაფარული კედლები, გაზაფხულის მათემატიკური აფეთქებული ყვავილებითა თუ მთებზე შეფენილი ლამაზი სახლებით და სხვა ღრმა შთამბეჭდავი დასამახსოვრებელი ნახატები თითქოს არა მარტო გამოგზავრებს ბუნების სამყაროში, არამედ ღრმად ჩაგახედებს ადამიანის სულშიც. აპრილი მისი თვეა. ასაკს არ ვამხელთ. ჩვენთვის მარად ახალგაზრდა მეგობარს გვინდა დაბადების დღე მივლოცოთ.

ზურაბ გილოცავთ დაბადების დღეს! გისურვებთ ჯანმრთელობას, დიდხანს სიცოცხლეს და წინსვლას შემოქმედებაში.

სამეგობრო

## სასკოლო ოლიმპიადა

„სასკოლო სპორტული ოლიმპიადა 2023“-ის ფარგლებში ქ.ამბროლაურში გაიმართა სპორტის სხვადასხვა სახეობებში შეჯიბრებები რეგიონის საჯარო სკოლებს შორის. სპორტის ისეთ სახეობებში, როგორცაა: მინიფეხბურთი, კალათბურთი, გეზბენი, მაგიდის ჩოგბურთი და ბადმინტონი თავი გამოიჩინეს ქალაქის პირველი და მეორე, სადმელის, ზვანჭკარის ბოსტანის, ნიკორწმინდის საჯარო სკოლების სპორტსმენებმა.

გამარჯვებულები, რომლებსაც ამბროლაურის მუნიციპალიტეტისაგან სიგელები და პრიზები საზეიმო ვითარებაში გადაეცათ, მონაწილეობას მიიღებენ სასკოლო სპორტული ოლიმპიადის ზონალურ თამაშებში.

სასიამოვნოა იმის აღნიშვნა, რომ სასკოლო სპორტული ოლიმპიადისადმი ინტერესი ყოველწლიურად მატულობს. კულტურის, განათლების სამინისტროებისა და ეროვნული სპორტული კომიტეტის მიზანიც სწორედ ისაა, რომ სპორტისადმი ინტერესი გაიზარდოს რეგიონებში მცხოვრებ მოსწავლე-ახალგაზრდობაში და ხელი შეეწყოს გამოვლენილ ნიჭიერ ბავშვებს სპორტული კარიერის სწორად წარმართვაში.

## შაჯახები შაჯახობენ

წლებია ამბროლაურის საჭიდაო კლუბ „ფალავანის“ მოჭიდავეები ქვეყნისა თუ საერთაშორისო ჩემპიონატებზე მოპოვებული მაღალი შედეგებით გვახარებენ.

ახლახან კლუბის „ფალავანი“ მოჭიდავეებმა ქ. ხაშურში გამართულ საქართველოს პირველობაზე 20 წლამდელთა შორის თავისუფალი სტილით ჭიდაობაში გუნდური მეორე ადგილი დაიკავეს. მათ ანგარიშზეა: ორი ოქრო, ორი ვერცხლი და ხუთი ბრინჯაო.

ვულოცავთ ახალგაზრდა სპორტსმენებს და მათ მწვრთნელებს მიღწეულ წარმატებებს და გვჯერა, რომ წელსაც კლუბის „ფალავანი“ მოჭიდავეები მრავალრიცხოვან გულშემატკივარს არაერთხელ გაახარებენ მაღალი შედეგების მოპოვებით.

## ნარგიზი ტურძილაძის ხსოვნა

ამბროლაურში მაღალი საზოგადოების სამახვმოდ მიჩნეულ ლეონიდე ტურძილაძის ოჯახში, საიდანაც მუდმივად ქართული სიტყვა და მუსიკა გასაოცარ ფერებში იღვრებოდა, მაღალი ზნეობის იშვიათი ნიმუშის წარმომადგენელი 6 შვილი აღიზარდა.

ინტელექტუალი ოჯახის ბედნიერება მშობლების ნანატრი შვილის, ხუთი დის საფუძვლიანი ძმის – ლევან 41 წლის ასაკში ტრაგიკულად აღსრულებამ დაარღვია. თითქოს დააჩქარა კიდევ ერთადერთ ძმისშვილზე მზრუნველი მამიდების ამ წუთისოფლიდან თანმიმდევრობით გასვლა. ახლახანს, ბოლო, მეექვსე ნარგიზა ტურძილაძეც მიეახლა მათ, ყველას და ყველაფრის წინაშე ვალმოხდილი. თითქოს შეისმინა უფალმა მისი სურვილი. გაზაფხულზე – მისში დაბადებული აპრილში აღესრულა.

თბილისსა და რუსთავში ცნობილია ფილოლოგმა, თაობების აღმზრდელმა, სამართლიანმა, კაცთმოყვარე, ფაქიზი სულის ადამიანმა სერიოზული კვალი დაამჩნია რაჭის თეატრალურ ცხოვრებას. საზოგადოებრივი საქმიანობით, ქვეყანაში გამომავალ ჟურნალ-გაზეთებში გამოქვეყნებული წერილებით, საკუთარი ლექსებით, პუბლიკაციებით, საგვარეულო საღამოების რედაქტორობით მოხიბლულ მკითხველსა თუ მაყურებელს ხმამაღლა ათქმევინა: ამ ქალბატონში ერთადაა შერწყმული გარეგნული და სულიერი სილამაზე.

ჰო და, ასე ლამაზად და ღირსეულად მიაცილეს, ამბროლაურზე და რაჭველებზე უზომოდ შეყვარებული ქალბატონი, საფიცარმა ძმისშვილმა ლილიმ, დისშვილებმა განსასვენებლად და მშობლების, ძმის ლევიკოს, დის მაცვალას გვერდით მიუჩინეს

სამუდამო ბინა. რამდენიმე დღეა მშვიდად განისვენებს ვალმოხდილი მათ გვერდით. სულ მალე, 40 დღის გასვლის შემდეგ, შეხვდება მონატრებულ დებს – ლილის, ნანულის, გულნაზის, ოჯახის პირველ დიდ ტკივილს სიძეს რევაზ კობახიძეს, როლანდი ფოფხაძეს, არჩილ აფციანს, რომლებიც განისვენებენ ზესტაფონის, ნიკორწმინდის, ფასანაურის სასაფლაოებზე. ანგარიშით წარსდგება მათ წინაშე (დემამიშივლებში ყველაზე დიდხანს მან იცოცხლა) და მშვიდად დაივანებს მისი სული მარადიულ სასუფეველში. იმ იმედით, რომ ლეონიდე და დარო ტურძილაძეების ოჯახის ტრადიციებს ღირსეულად გააგრძელებენ ძმისშვილისა და დისშვილების შთამომავლები.

ადამიანის სიცოცხლე ხომ იმით ფასდება რამდენი ხანი ემასხოვრებათ სიკვდილის შემდეგ. მარადიული ხსოვნა და ნათელი თქვენ



ღირსეულო ადამიანებო. სერიოზული კვალი დატოვეთ ამიერში. დავიწყება არ გინერიათ, დაიმსახურეთ.

სამეგობრო

<p><b>რედაქციის მისამართი:</b> ქ. ამბროლაური, დავით აღმაშენებლის ქუჩა №24 ტელ: 593 60 40 67</p>	<p><b>„ამბროლაურის მოამბე“</b> რეგისტრირებულია ამბროლაურის სასამართლოს მიერ. რეგისტრაციის №15/5/ზ103</p>	<p><b>გაზეთი დაიბეჭდა</b> ბაკური კიოტაძის მიერ ქუთაისი, წერეთლის ქ. №186. ტელ: 0431 23 45 54</p>	<p>გაზეთი დამოუკიდებელია და ხელმძღვანელობს თავისუფალი პრესის პრინციპით. რედაქციის აზრი შესაძლოა არ ემთხვეოდეს მასალის ავტორის მოსაზრებებს, ავტორი პასუხისმგებელია მასალის, ფაქტების, ინფორმაციის სიზუსტეზე, შინაარსსა და სტილზე.</p>
---	--	--	--